Zeitschrift: Le nouveau conteur vaudois et romand

Band: 75 (1948)

Heft: 6

Rubrik: Lo vîlhio dèvesâ

Autor: [s.n.]

Nutzungsbedingungen

Die ETH-Bibliothek ist die Anbieterin der digitalisierten Zeitschriften auf E-Periodica. Sie besitzt keine Urheberrechte an den Zeitschriften und ist nicht verantwortlich für deren Inhalte. Die Rechte liegen in der Regel bei den Herausgebern beziehungsweise den externen Rechteinhabern. Das Veröffentlichen von Bildern in Print- und Online-Publikationen sowie auf Social Media-Kanälen oder Webseiten ist nur mit vorheriger Genehmigung der Rechteinhaber erlaubt. Mehr erfahren

Conditions d'utilisation

L'ETH Library est le fournisseur des revues numérisées. Elle ne détient aucun droit d'auteur sur les revues et n'est pas responsable de leur contenu. En règle générale, les droits sont détenus par les éditeurs ou les détenteurs de droits externes. La reproduction d'images dans des publications imprimées ou en ligne ainsi que sur des canaux de médias sociaux ou des sites web n'est autorisée qu'avec l'accord préalable des détenteurs des droits. En savoir plus

Terms of use

The ETH Library is the provider of the digitised journals. It does not own any copyrights to the journals and is not responsible for their content. The rights usually lie with the publishers or the external rights holders. Publishing images in print and online publications, as well as on social media channels or websites, is only permitted with the prior consent of the rights holders. Find out more

Download PDF: 03.11.2025

ETH-Bibliothek Zürich, E-Periodica, https://www.e-periodica.ch



Quemet on fâ on syndic

Un abonné nous écrit avoir retrouvé parmi un certain nombre d'articles-souvenirs, ce savoureux morceau de patois publié le 20 décembre 1941 dans la Feuille d'Avis de Lausanne... et signé... du bien connu Marc à Louis.

Nous nous faisons un plaisir de le mettre sous les yeux de nos lecteurs patoisans auquel

il aurait pu échapper...

L'affére bourmâve vè lo Luvi à Maisonneu, lo syndic. Sa fenna, la Julie lâi fasâi la potta. Faut vo dere assebin que l'étâi lo momeint dâi vôte et que, ma fâi ètâi soveint via la veillâ. Justameint ètâi ein train de sè revoûdre (s'endimancher) quand la Julie, lo mor refregnu, l'eintre.

JULIE (retsegnâre). — Yô va-to oncora?

LUVI. — Lâi a la tenâbllia *(séance)* dão Conset générat po renommâ la Municipalitâ et lo Syndic.

JULIE (pottuva). — Oncora onna veilla que sarî soletta. Et prão su que te vão tè laissî remettre po syndic.

LUVI. — Mâ oï. Porquie?

JULIE (que brâme). — Cein n'è pas onna vya. Tî adì via. Y'ein é tant qu'âi get de clli commerce!

LUVI. — Adî via, adî via! Faut bin fére cein que faut!

JULIE (adî bourmeint). — N'è rein lè ténâblie! L'è aprî! Faut verrotâ et trinquotâ la mâitî de la né. L'hommo l'a tot lo plliési et la fenna tote lè couson.

LUVI. — Lâi a grand teimps que mè desé assebin que voliâvo pas mè laissî remettre.

JULIE (roûtso). — Tè preigno âo mot. Te tè mècllierî de tè z'affére. Po cein que cein tè rapporte de fére lè travau dâi z'autro. Sarâ pas dèfecilo po leu de trovâ quaucon de meillâo. Dinse, te ne sarî pas adî outre la né pè lo Lion d'Or, que la Justine, cllia cheint mau, fâ esprêt de vo gardâ.

LUVI. — Eh bin! l'è de. Mè laisso pas renommâ du qu'on a adî dâi niéze.

JULIE (grindze). — Tant mî! qu'on autra

fenna pouésse omète savâi cein que l'è. Lo lâi cozo bin!

LUVI. — Bon! dinse te n'arf pe rein à reproudzî. L'è lo premî municipau que vindrâ syndic et pu l'è tot.

JULIE (que ronne). — Tant mî! Cô è-te? LUVI. — Sandron.

JULIE (adî retsegnâre). — Quin Sandron? Clli qu'à la Méry?

LUVI. — Vâ, l'hommo à la Méry! la vesena! JULIE (dzalâosa, routse, tot d'onna teryâ). — Cllia serpa que fâ dza rein que de mè mourgâ! Cllia Méry que quand fâ la buïa, n'èpantse su lo cordî que sè pe biau pantet po mè fére vère son galé leindzo, et que chètse sè freguelhie la né! Cllia Méryclietta, que sè brague d'avâi zu on trossî tot de doze et tot ein boû dur po sè mâobllio! Cllia Ryfllietta que n'a rein que l'orgouet mônet, l'è li que sarâi la syndica!

LUVI. — L'è su, du que son hommo sarâ syndie!

JULIE (que l'è po tsezî dâo gros mau). — Ne crayé pas lè z'hommo asse tadyé... (Rabonnaye) accuta, Vivi, vâo-to mè fére on plliési? Tè lo revaudrî!

LUVI. — Oï!

JULIE (tota dâoça, aprî que l'a ruminâ). — Laisse-tè remettre.

LUVI. — Et lè tenâbllie que faut alla la veilla ?

JULIE (de bouna). — Ein n'a pas tant.

LUVI. — Et qu'on roûde la maîtî de la né... JULIE (cocoleinta). — L'è su que quand vo z'âi bin travaillî po la coumouna, vo z'âi bin affanâ on verro!

LUVI. — Et qu'on laisse sè z'affére?

JULIE (soreseinta). — Vu prâo m'ein mécllia. Sâi sein couson.

LUVI. — Adan, t'î d'accoo po mè reporta?

JULIE (que l'einbranse). — Oï, mon galé!

Fâ dâi pî et dâi man po que clliâ pointuva de
Ricclietta vigne pas syndica! Va vito, mon
Vivi!

Vè la miné, Luvi revint. La cllière bourle adî. Julie l'è âo lhî à la pllièce à Luvi.

JULIE (tota de bouna). — Et pu?

LUVI. -- M'ant renommâ!

JULIE (tota benaise). — La Riclietta sarâ pas syndica. Dusse bin bisquâ !... Tevâi, t'é retsâodâ ta pllièce !

Marc à Louis.